



Istât dal 1947. Il Poete al pedale pes stradis di Rude, tor sere.

Al sta lant a Çarvignan, a cjatâ il so ami pitôr. A varan di resonâ di un grum di robis, ancje se, infin, a fasaran a gare a cjapâsi mancûl sul seri.

L'air al profume di jerbe e di fossâi. Il soreli bas al bruse la planure furlane dai clups dôrs come pieris, e la noglose blave.

La fieste de Unitât e je finide il dì prin: lis ridadis pai bai, stant atents al cidinôr, si sintin ancjemò e dut al somee involuçât intun strani lancûr. La Istât e somee jessi sprofondade te inciertece di un riflès. E lis sfumaduris dal cîl si corin daûr cence premure.

Lis stagjons a àn lengaçs segrets e il Poete al sa ben che i oms no puedin fâ altri che cirî di decifràju.

Une frutine, cinc agns, forsit sîs, e sta vaint su la orladure di une strade plene di polvar.

Discolce, lis piçulis mans sui voi.

Lui le viôt e si ferme.

«Parcè vaistu, frutine?»

La piçule e distapone i siei voi grîs.

«Parcè che o ai pierdût la mê pipine di straçs».

Il Poete al dismonte de biciclete.

Al somee risolût, pûr i siei pas a son lizêrs e plens di cure.

«Dulà le âstu viodude la ultime volte?» al domande, cence fâ câs al polvar sui siei bregons.

La frutine e je malfidade e par vie che la sô difidence no je ancjemò stade smentide di nissun fat, si sint pierdude devant dal scognossût e de sôs domandis.

Dopo cualchi voglade butade ca e là, e cjape il coragjo di une rispueste a basse vôs.

«La ultime volte le ai viodude dentri dal vecjo morâr. E je une buse tal len... Ma là, la mê pipine no je plui».

Il Poete si met a puest i ocjâi e al fâs di sî cul cjâf.

«La tô pipine no si è pierdude. E à scugnût lâ vie di bot par un lunc viaç».

La frutine, maraveade de rispueste, e cjape spirt.

«Dulà ise lade?»

«E je lade tal paîs dai zugatui. No ti à dit nuie par che no tu patissis».

«E dulà isal il paîs dai zugatui?»

«Lontan, un grum lontan».

«Ma la mê pipine... Tornaraie?»

«Se no torne, ti scriverà e e sarà dongje di te par simpri».

Jê lu cjale, plene di pinsîrs.

«Ma parcè ise lade vie?»

Lui le cjale, cuasi ingropât.

«Parcè che e jere tant contente e e voleve che lu savessin ancje i siei amîs zugatui... La felicitât e à di jessi contade».

La frutine si suie lis lagrimis. No je sigure di vê capît ben chestis peraulis, ma i scjampe di ridi. Il Poete al torne a montâ in biciclete. Prime di lâ vie, i mande une bussade nete come aghe di risultive.

Rude e la frutine dai voi grîs a son aromai lontans, cuant che i contadins a tornin scanâts dai cjamps, la blave e bruse simpri plui di distance e l'aiar al profume di antîc solêf.

Plui d'ur dal clap al è il ricuart: a disin i vecjos analfabets de Basse devant de ultime tace di vin, tant che l'aiar de sere al è une ombre jenfri dai morârs.

Al rive a Çarvignan e chestis a son lis peraulis furlanis che il Poete al cognòs ben e che al continue a riviodi tai cidinòrs che mai a tasin, tes lusignis che a balin, te fadie cjoche dai ultins lavoradòrs che a tornin cjase nets di cualsisedi ilusion.

A cjase dal so ami Pitôr, invezit, prin di fâ a gare a cjapâsi mancul sul seri, i conte une storie piçule, no plui grande di une pipine di peçots.

Pôc timp dopo, la frutine e cjate un sfuei di cjarte dentri dal tronc di un vecjo morâr.

E je une letare dute par jê, spedide dal paîs dai zugatui.

E jê e rît, cuasi stordide de contentece, par chel che al sarà il so prin corât ricuart.

di Davide Ballaminut

#1037

*Conte segnalade a **Vôs de Basse 2020***